

Na osnovu člana 8. stav 2. alineja 28. Zakona o principima lokalne samouprave u Federaciji Bosne i Hercegovine („Službene novine Federacije BiH, broj: 49/06) i člana 25. Statuta Općine-Prečišćeni tekst („Službeni glasnik Općine Bihać“ broj: 2/11), Općinsko vijeće općine Bihać, na 47 sjednici održanoj dana 12.07.2011. godine, donosi

## **ODLUKU**

### **o uslovima i načinu držanja kućnih ljubimaca na području općine Bihać**

#### **I OPĆE ODREDBE**

##### **Član 1.**

Ovom Odlukom se propisuju uslovi i način držanja kućnih ljubimaca, način držanja pasa i mačaka, kontrola njihovog razmnožavanja, kretanje kućnih ljubimaca u objektima i površinama javne namjene, način postupanja sa neregistriranim psima, napuštenim i izgubljenim životinjama na području općine Bihać, radi zaštite životinja i ljudi koji s njima dolaze u dodir.

##### **Član 2.**

Na području općine Bihać mogu se u skladu sa ovom Odlukom držati kućni ljubimci koji ne ugrožavaju fizički i psihički integritet, ličnu sigurnost i imovinu građana, ne remete javni red i mir, ne izazivaju osjećaj staha i gađenja, pri čemu uslovi gajenja moraju u potpunosti zadovoljavati njihovu dobrobit.

##### **Član 3.**

Odredbe ove odluke ne odnose se na životinje koje služe za potrebe Ministarstva unutrašnjih poslova i Ministarstva odbrane BiH, kao i službene pse i pse vodiče osoba sa posebnim potrebama

#### **II. USLOVI I NAČIN DRŽANJA KUĆNIH LJUBIMACA**

##### **Član 4.**

Držaoc kućnog ljubimca ( psa, mačke, ribe, zamorca, ptice i dr.) dužan je brinuti o njegovom zdravlju, ishrani, smještaju, higijeni, i prema njemu postupati u skladu sa Zakonom i drugim propisima o zaštiti i dobrobiti životinja, veterinarstva, zaštite okoliša, javnog reda i mira, te odredbama ove Odluke.

Držaoc kućnog ljubimca koji se više o njemu ne može brinuti u skladu sa stavom 1. ovog člana dužan je pronaći udomitelja odnosno udruženje građana ili osobu koja će o njemu brinuti na propisan način ili ga predati Skloništu za životinje, kojeg u skladu sa Zakonom osnuje fizička ili pravna osoba, općina, ili kanton, te snositi troškove boravka do udomljenja ili drugog načina zbrinjavanja životinje.

## Član 5.

Držaoc kućnog ljubimca dužan je osigurati da kućni ljubimac ni na jedan način ne ometa javni red i mir, uslove stanovanja, utvrđeni kućni red i mir građana, te da ne ugrožava sigurnost građana i sigurnost drugih životinja.

U slučaju odsutnosti duže od 24 sata držaoc je dužan osigurati nadzor i brigu punoljetne osobe za svog kućnog ljubimca u skladu sa njegovim potrebama.

Nije dozvoljeno držati ili ostavljati kućnog ljubimca u zajedničkim prostorijama zgrade ( ulazi, stubišta, liftovi, podrumi, prostorije za odlaganje smeća, kotlovnice, sušاونice i slično).

Za držanje kućnog ljubimca u zajedničkom dvorištu zgrade ili zgrada, držaoc mora imati saglasnost svih suvlasnika ili vlasnika zgrade ili drugog zakonskog posjednika dvorišta.

Držaoc kućnog ljubimca dužan je brinuti o čistoći zajedničkih prostorija kojima se kreću kućni ljubimci, te očistiti ili oprati površinu ukoliko je njegov kućni ljubimac na bilo koji način onečistio površinu.

## III USLOVI ZA DRŽANJE PASA I MAČAKA

### Član 6.

Dozvoljeno je držanje pasa koji su registrovani, označeni s pomoću mikročipa i cijepljeni.

Registraciju, označavanje, cijepljenje te provođenje i drugih propisanih veterinarsko-zdravstvene mjera u skladu sa Zakonom o veterinarstvu i Zakonom o dobrobiti životinja provodi nadležna veterinarska organizacija koja vodi upisnik životinja i izdaje službenu ispravu za životinju.

Držaoci pasa dužni su prijaviti nabavku odnosno uginuće ili otuđenje psa u roku od 7 dana od dana nabavke, uginuća ili otuđenja psa veterinarskoj organizaciji koja vodi upisnik.

Troškove registracije pasa, označavanja i provođenja propisanih veterinarsko-zdravstvenih mjera snosi držaoc.

### Član 7.

U stambenoj zgradi sa više stanova dozvoljeno je držanje u stanu najviše jednog psa odnosno najviše dvije mačke.

Štenad odnosno mačići mogu se držati najduže 3 (tri) mjeseca nakon okota.

Nije dozvoljeno držanje psa ili mačke na balkonu ili terasi stambene zgrade sa više stanova.

### Član 8.

U porodičnoj kući ili dvorištu porodične kuće dozvoljeno je držati pse i mačke na način da ne ometaju red i mir građana.

Pas koji se drži u neograđenom dvorištu mora biti vezan lancem na način da ne ometa kretanje i sigurnost građana ili biti smješten u ograđeni prostor – boks, koji će osigurati životinji da se samostalno ne može udaljiti.

Držaoc ne smije vezati psa na lanac koji je kraći od 3 (tri) metra ili trostruke dužine životinje, mjereno od vrha repa do vrha njuške.

Ukoliko se pas drži u ograđenom prostoru za psa ili kućici za psa, smještaj kućice ili ograđenog prostora mora biti takav da ne ometa stanovanje u susjednom dvorištu.

Pas koji se drži u ograđenom dvorištu, okućnici ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, na ulaznim dvorišnim vratima mora biti zvono u ispravnom stanju, te na vidnom mjestu ispisana oznaka koja upozorava na psa.

#### Član 9.

Držaoci opasnih pasa ( psi koji prema svojim prirodnim/ urođenim sklonostima mogu ispoljavati agresivnost) dužni su iste držati u skladu sa Pravilnikom o držanju opasnih životinja ( Sl. glasnik BiH, broj:27/10.)

### IV NAČIN KONTROLE RAZMNOŽAVANJA

#### Član 10.

Držaoci pasa i mačaka moraju osigurati kontrolu razmnožavanja životinja pod njihovim nadzorom, a za sve potomke svojih životinja snose odgovornost i nekontrolisano razmnožavanje svojih ljubimaca moraju spriječiti.

Načini kontrole razmnožavanja kućnih ljubimaca mogu biti:

- preventivno djelovanje ( kastracija i sterilizacija)
- kontrola kretanja u vrijeme tjeranja ženki
- upotreba veterinarskih sredstava

Poslove preventivnog djelovanja i upotrebe veterinarskih sredstava iz stava 2. ovog člana obavlja nadležna veterinarska organizacija.

### V KRETANJE PASA NA JAVNIM POVRŠINAMA

#### Član 11.

Držaoc psa može psa izvesti van zatvorenog prostora samo na kratkom povodniku dužine 3 m i sa zaštitnom korpom na njušci. Bez zaštitne korpe, a na odgovarajućem povodniku, mogu se izvoditi psi malih i srednjih rasa do 10 kg (deset kilograma) težine, kao i štenad starosti do 4 ( četiri) mjeseca.

Pas koji se izvodi na javnu površinu mora imati propisanu ispravu o registraciji pasa, koju je na zahtjev komunalnog redara ili komunalnog inspektora dužan pokazati.

#### Član 12.

Zbog zdravstvenih higijenskih i drugih razloga zabranjeno je dovoditi pse u objekte javne namjene, banke, tržnice, vozila javnog prijevoza, trgovine, ugostiteljske objekte, dječija igrališta, sportske terene, sajmove, javne skupove, kupališta, groblja i slično.

O dozvoli ili zabrani uvođenja pasa u hotele, apartmane, i druge smještajne i ugostiteljske objekte, obrtničke radnje i trgovine neprehrambenim proizvodima, odlučuje vlasnik i to označava postavljanjem naljepnice sa likom psa, odnosno s prekriženim likom psa, na ulazna vrata u objekat.

Ograničenje kretanja kućnih ljubimaca ne primjenjuje se na pse osposobljene za pomoć osobama sa posebnim potrebama, izuzev u slučaju kada je ograničenje utvrđeno posebnim propisom.

#### Član 13.

Ukoliko pas ili mačka pri izvođenju iz stana ili dvorišta, iz bilo kojih razloga onečisti, stazu, put, zelenu površinu ili drugi prostor, držalac psa ili mačke je dužan da onečišćenu površinu očisti.

Ako pas ili mačka ošteti nečiju imovinu, držalac životinje je dužan izvršiti popravku ili nadoknaditi materijalnu štetu oštećenom fizičkom ili pravnom licu.

### VI POSTUPANJE SA NAPUŠTENIM I IZGUBLJENIM PSIMA

#### Član 14.

Neupisane pse nepoznatih držaoca, napuštene i izgubljene životinje sakuplja higijenski servis/sklonište za životinje kojeg u skladu sa Zakonom osnuje fizička ili pravna osoba, općina ili kanton.

#### Član 15.

Troškove hvatanja, prevoza, prihvata, veterinarsko-zdravstvenih mjera i usmrćivanja što ih je higijenski servis/ sklonište za životinje poduzelo prema neregistriranim, napuštenim i izgubljenim psima snosi njihov držaoc, ako je poznat ili se naknadno utvrdi, a ako nije poznat troškovi se u skladu sa Zakonom o zaštiti i dobrobiti životinja, podmiruju iz budžetskih sredstava i drugih Zakonom propisanih vidova finansiranja.

#### Član 16.

Dok tijela predviđena Zakonom o zaštiti i dobrobiti životinja (Službeni glasnik BiH broj:25/09) ne osnuju skloništa za životinje, JP“Veterinarska stanica“ doo Bihać će u saradnji sa JPK “Komrad“doo Bihać, JU „Zavod za prostorno uređenje“Bihać, nadležnim Općinskim službama i volonterima Udruženja ljubitelja životinja vršiti hvatanje, prevoz, kastraciju, sterilizaciju i obilježavanje napuštenih životinja, njihovo smještanje i nadzor u stacionaru pri JP“Veterinarska stanica“ doo Bihać, njihovo udomljavanje ili puštanje na mjesta prirodnog staništa, naročito pasa lotalica, a u svrhu stabilizacije populacije napuštenih životinja.

#### Član 17.

Držaoc kućnog ljubimca dužan je nadoknaditi svaku štetu koju prouzrokuje njegov kućni ljubimac.

Držaoc izgubljenog kućnog ljubimca dužan je nadoknaditi svaku štetu koju počini takav kućni ljubimac, od momenta njegovog nestanka do momenta njegovog pronalaska i vraćanja kućnog ljubimca držaocu.

## VII NADZOR

### Član 18.

Komunalni redari i komunalni inspektori općine Bihać u skladu sa svojim ovlastima vrše nadzor nad provođenjem odredbi člana 5.,7., 8., 11., 12.i 13., ove Odluke.

Ako komunalni redar u svom radu naiđe na otpor, može zatražiti pomoć nadležne policijske uprave.

Veterinarska inspekcija u skladu sa svojim ovlastima vrši nadzor u slučajevima kršenja odredbi ove Odluke koje su uređene Zakonom o veterinarstvu i Zakonom o zaštiti i dobrobiti životinja.

## VIII KAZNE ODREDBE

### Član 19.

Novčanom kaznom u iznosu od 200 do 250 KM kazniće se za prekršaj pravno lice i odgovorno lice u pravnom licu, ako postupi u suprotnosti sa članom 2.,4.,5.,6.,9.,10.,12. i 13.

### Član 20.

Novčanom kaznom u iznosu od 30 do 50 KM kazniće se za prekršaj fizičko lice ako postupi u suprotnosti sa članom 2., 4., 5., 6., 7.,8., 9., 10., 11.,12., i 13.

### Član 21.

Za prekršaj iz člana 11., 12. i 13. komunalni inspektor može od držaoca kućnog ljubimca kojeg zatekne u prekršaju primjeniti kaznu na mjestu počinjenja u iznosu od 30 KM.

## VIII ZAVRŠNE ODREDBE

### Član 22.

Danom stupanja na snagu ove Odluke prestaje da važi Odluka o broju i načinu držanja pasa i mačaka ( Službeni glasnik općine Bihać, broj 2/96).

### Član 23.

Ova Odluka stupa na snagu osmog dana od dana objavljivanja u „Službenom glasniku općine Bihać“.

Broj: 02-02-5020/11  
Bihać, 12.07.2011. godine

Predsjedavajući Općinskim vijećem  
Željko Mirković